

ՀՀ ԺՈՂՈՎՐԴԱԳՐԱԿԱՆ ԻՐԱՎԻՃԱԿԸ.

ՎԱՏԹԱՐԱՑՈՒՄ, ԹԵՆ ԾԳՆԱԺԱՄ

Հիմնաբառեր. *ժողովրդագրական իրավիճակ, դեպոպուլյացիա, ճգնաժամ, բնական հավելած, միգրացիա*

Հայաստանի Հանրապետության ներկայիս ժողովրդագրական իրավիճակը բնութագրելու համար շատ հաճախ օգտագործվում են «դեպոպուլյացիա» (վատթարացում), «ժողովրդագրական ճգնաժամ», «ժողովրդագրական աղետ» և այլ եզրույթներ: Խնդիրն այն է, որ շատ հաճախ դրանք գործածվում են նույն իմաստով՝ ապակողմնորոշելով հանրությանը և կառավարությանը ժողովրդագրական խնդիրներից և խեղաթյուրելով դրանց կարևորությունը երկրի հետագա զարգացման համար:

ՀՀ վարչապետի 2019 թվականի ապրիլի 4-ի N347-Ա որոշմամբ՝ ստեղծվեց ժողովրդագրական իրավիճակի բարելավման խորհուրդ, որի հիմնական նպատակը ներկայում առաջացած ժողովրդագրական անբարենպաստ իրավիճակը հաղթահարելու ուղիներ գտնելն է: ՀՀ-ում ժողովրդագրական իրավիճակի բարելավման ուղիները ճիշտ մատնանշելու և միջոցառումների արդյունավետության մակարդակը բարձրացնելու համար, նախևառաջ, անհրաժեշտ է պարզել, թե վերը նշված եզրույթներից որի տիրույթում ենք այժմ գտնվում: Նախ՝ մեկնաբանենք այդ եզրույթները:

Դեպոպուլյացիա (վատթարացում) - բնակչության թվաքանակի նվազման երկարատև գործընթաց, որը տեղի է ունենում բնակչության «նեղ» վերարտադրության հետևանքով՝ հանգեցնելով վերջինիս «ծերացմանը»: Դա կարող է ուղեկցվել միգրացիայի ինչպես բացասական, այնպես էլ դրական մնացորդով:

Ժողովրդագրական ճգնաժամ - բնակչության թվաքանակի կտրուկ նվազում կամ աճ: Հիմնականում օգտագործվում է բնակչության բնական աճի կամ միգրա-



Վահե ԲՈՒԼԱՆԻԿՅԱՆ

Տնտեսագիտության
թեկնածու, դոցենտ

1994 թ. ավարտել է ԵրԺՏԻ-ն (այժմ՝ ՀՊՏՀ): 1994-1997 թթ. սովորել է ԵՐԺՏԻ ասպիրանտուրայում՝ «Տնտեսագիտության տեսություն» մասնագիտությամբ: 1998 թ. առ այսօր զբաղվում է գիտամանկավարժական գործունեությամբ տնտեսագիտության տեսության ամբիոնում. սկզբում՝ որպես ասիստենտ, այնուհետև՝ որպես դոցենտ: 2018 թ. մինչ օրս ՀՊՏՀ «Ամբերդ» հեղափոխական կենտրոնի ավագ հետազոտող է: Հեղինակ է շուրջ 35 գիտական աշխատանքների:

¹ <http://www.irtek.am/views/act.aspx?aid=98923>

ցիայի բացասական բարձր մնացորդ ունեցող երկրների կամ տարածաշրջանների համար: Դա ուղեկցվում է նաև ազգաբնակչության հոգևոր, մշակութային արժեքների անկմամբ:

Ժողովրդագրական աղետ- կարճ ժամանակահատվածում (մինչև 5 տարի) բնակչության թվաքանակի կտրուկ անկում՝ պայմանավորված սոցիալական և բնակլիմայական պայմանների նշանակալի վատթարացմամբ:

Ինչպես երևում է աղյուսակ 1-ում բերված պաշտոնական վիճակագրական տվյալներից, ՀՀ-ում ժողովրդագրական բոլոր հիմնական ցուցանիշները բացասական ուղղությամբ են փոփոխվել: Մասնավորապես՝ 1990 թ. համեմատ, 2018 թ. մշտական բնակչության թվաքանակը նվազել է 15,4 տոկոսով, 1000 բնակչի հաշվով բնական հավելանք՝ մոտ 4,5 անգամ, 1000 բնակչի հաշվով միգրացիայի բացասական մնացորդն աճել է մոտ 6 անգամ, ծնելիության ընդհանուր գործակիցը 1000 բնակչի հաշվով նվազել մոտ 2 անգամ, մահացության ընդհանուր գործա-

կիցը 1000 բնակչի հաշվով աճել է մոտ 40 տոկոսով, պտղաբերության գործակիցը 1 կնոջ հաշվով նվազել է մոտ 38,5 տոկոսով, բնակչության միջին տարիքն աճել է մոտ 13,4 տոկոսով (2017 թ.՝ համեմատած 2000 թ. հետ): Նշված ցուցանիշների շարժընթացն ու ընդգրկման ժամանակահատվածը (մոտ 30 տարի) վկայում են, որ ՀՀ-ն ներկայում ժողովրդագրական իրավիճակի «դեպոպուլյացիոն» շրջանում է:

Բնակչության դեպոպուլյացիան բնորոշ է աշխարհի շատ երկրների: Ինչպես երևում է գծապատկեր 1-ից, վիճակն առավել վատթար է եվրոպական երկրների գերակշիռ մասում: Այս երկրները բնակչության բնական հավելանքի բացասական մնացորդը փորձում են փոխհատուցել իմիգրացիոն (ներգաղթի) «մեղմ» քաղաքականությամբ: Իմիգրացիային միտված ավելի «ազդեցիկ» քաղաքականություն վերջին տարիներին իրականացնում է Ռուսաստանի Դաշնությունը՝ առավելապես նախկին ԽՍՀՄ հանրապետությունների քաղաքացիների նկատմամբ:

ԱՂՅՈՒՄԱԿ 1


ՀՀ ժողովրդագրական հիմնական ցուցանիշների շարժընթացը 1990-2018 թթ.¹³

	1990	2000	2005	2010	2015	2017	2018
Մշտական բնակչության թվաքանակը (հազ. մարդ)	3514.9	3226.9	3156.0	3055.2	3010.6	2986.1	2972.7
Բնական հավելանքի գործակիցը՝ 1000 բնակչի հաշվով	16,3	3.1	3.5	5.5	4.6	3,5	3.6
Բնակչության միգրացիայի մնացորդը՝ 1000 բնակչի հաշվով	1,7	-2,7	-2,4	-12,3	-8,6	-8,0	---
Ծնելիության ընդհանուր գործակիցը՝ 1000 բնակչի հաշվով (%)	22,5	10,6	11,9	14,7	13,9	12,6	12,3
Մահացության ընդհանուր գործակիցը՝ 1000 բնակչի հաշվով (%)	6,2	7,5	8,4	9,2	9,3	9,1	8,7
Պտղաբերության գործակիցը՝ 1 կնոջ հաշվով (երեխա)	2,6	1,3	1,3	1,5	1,6	1,6	1,6
Բնակչության միջին տարիքը	---	32,1	33,7	34,3	36,1	36,4	---

² Աղբյուրը՝ ՀՀ վիճակագրական տարեգրքեր՝ 2018, 2011, 2006, 2001, 1993-1994 թթ., <https://www.armstat.am/am/?nid=12&id=11011&submit=%D5%93%D5%B6%D5%BF%D6%80%D5%A5%D5%AC>

ԳԾԱՊԱՏԿԵՐ 1

Բնակչության բնական աճը 2017 թ.³



Քարտեզում արտացոլված են բնակչության դեպոպուլյացիա ունեցող երկրները՝ բնակչության բացասական աճ (մուգ կապույտ), աննշան աճ (կապույտ) և զգալի աճ (կանաչ, դեղին, կարմիր):

«Հ ժողովրդագրական իրավիճակի դեպոպուլյացիան հիմնականում պայմանավորված է երեք գործոնով.

1. Ծնելիության ցածր մակարդակ: Հայաստանում ծնելիության գործակիցը 2019 թ. 1.6 է: Աշխարհում ծնելիության ամենացածր գումարային գործակից ունեցող երկրներն են Սինգապուրը՝ 1.0 և Պորտուգալիան՝ 1.2 ցուցանիշով: Նշենք, որ բնակչության պարզ վերարտադրության գործակիցը պետք է հավասար լինի 2,1-ի:

2. Միգրացիայի բացասական մնացորդ (վերջին 10 տարվա ընթացքում «Հ միգրացիայի բացասական մնացորդը տարեկան կտրվածքով միջինում 24 հազար մարդ է»⁴:

3. Ուրբանիզացիայի բարձր մակարդակ: «Հ-ում ուրբանիզացիայի մակարդակը 2018 թ. մոտ 64 տոկոս է⁵, այնինչ աշխարհում դա տատանվում է 50-52 տոկոսի սահմաններում: Երևանում բնակվում է ՀՀ բնակչության մոտ 36 տոկոսը (2018 թ.)⁶: Մինչդեռ այլ երկրներում մայրաքաղաքային բնակչության թվաքանակը հիմնականում կազմում է տվյալ երկրի ամբողջ բնակչության առավելագույնը 15 տոկոսը:

Ակնհայտ է, որ այս ուղղություններով պետք է իրականացնել պետական մակարդակով լուրջ և համակարգված քաղաքականություն: Որպես կարճաժամկետ թիրախ՝ անհրաժեշտ է ընտրել էմիգրացիայի (արտագաղթի) տեմպերի կանխումը և ուրբանիզացիայի մակարդակի նվազեցումը: Ինչհի առաջին հերթին պետք է թիրախավորել այս գործոնները: Միջազգային փորձը (հատկապես՝ զարգացած երկրների) ցույց է տալիս, որ, ի վերջո, չկա ծնելիության խթանման այնպիսի արդյունավետ սոցիալական քաղաքականության գործիքակազմ, որը հնարավորություն կտա կարճաժամկետում բարելավելու ժողովրդագրական իրավիճակը: Միաժամանակ, ուրբանիզացիայի տեմպերի թուլացումը կարող է անմիջական դրական ազդեցություն ունենալ ծնելիության ընդհանուր մակարդակի վրա, քանի որ կենտրոններում բնակվող երիտասարդները (հիմնականում՝ կանայք) շատ դեպքերում կարևորում են աշխատանքային առաջընթացը՝

³ https://commons.wikimedia.org/wiki/File:%D0%95%D1%81%D1%82%D0%B5%D1%81%D1%82%D0%B2%D0%B5%D0%BD%D0%BD%D1%8B%D0%B9_%D0%BF%D1%80%D0%B8%D1%80%D0%BE%D1%81%D1%82_%D0%BF%D0%BE_%D1%81%D1%82%D1%80%D0%B0%D0%BD%D0%B0%D0%BC_%D0%BC%D0%B8%D1%80%D0%B0_2017.png

⁴ Աղբյուրը՝ ՀՀ վիճակագրական տարեգրքեր՝ 2009-2018 թթ.:

⁵ Աղբյուրը՝ ՀՀ վիճակագրական տարեգիրք 2018 թթ.:

⁶ Նույն տեղում:

հետին պլան մղելով ֆիզիոլոգիական «կարիերան»:

Ինչ վերաբերում է միգրացիոն խնդիրներին, ապա պետք է նշել, որ 2018 թ. երկրում տեղի ունեցած արմատական փոփոխությունների արդյունքում իրական հնարավորություն է ստեղծվել արդյունավետ սոցիալ-տնտեսական քաղաքականության իրականացմամբ ոչ միայն նվազեցնելու արտագաղթի տեմպերը, այլև խթանելու ներգաղթը (խոսքը, իհարկե, արտասահմանում ապրող մեր հայրենակիցների մա-

սին է):

Կարծում ենք՝ բնակչության արտագաղթի տեմպերը նվազեցնելու տեսանկյունից առաջնային և իրական քայլեր պետք է կատարվեն հատկապես երիտասարդ և երեխա չունեցող ընտանիքների բնակարանային ապահովման մատչելիության ընդլայնման, ինչպես նաև ծնելիության մակարդակի բարձրացման նպատակով՝ ֆինանսական խրախուսման ծրագրերի իրականացման ուղղությամբ:

Հ.Գ. *Բնակչության դեպոպուլյացիան անշրջելի երևույթ չէ. այն առաջացել է մարդու ներգործությամբ և, հետևաբար, կարող է վերանալ նրա միջամտությամբ:*

